

四庫全書

史部

欽定四庫全書

史部

景定建康志卷二十三至五

詳校官監察御史臣沈孫璉

檢討臣德生覆勘

總校官檢討臣何思鈞

校對官中書臣張曾炳

謄錄監生臣史殿榮

欽定四庫全書

景定建康志卷二十三
宋 周應合 撰

城關志四

諸倉

廣濟倉有東西倉又有新倉西倉在大軍倉後崇道橋
南東倉在武雄營側新倉在廣濟西倉北乾道四年留
守史公正志以親軍寨及作院地增拓舊基西偏建為
新倉轉運副使趙公彥端為記

倉記

上臨御之六年中都之倉廩實乃始建豐儲倉著粟百萬然議者猶謂宜倣古實邊之意藏之

外便時天官貳卿史公正志躬獻納而彥端掾公府皆與聞之未幾公出鎮建康彥端亦將漕江東踵至馬會秋上熟其糶二十幾以病農公乃推前議大出庫錢斂而藏之以均本末成先備而廩人病委積之無所也以告益昔之為倉者三曰廣濟曰常平曰大軍綿亘錯峙凡百有條極自他郡賦之可謂壯矣惟帝之別都天下勁兵良馬在焉歲之經入無慮數十萬斛漕江而下者舳舻數千里方其流衍全集雖佛廬賓傳為之充仞而阜棧之供有至于露積者然古帝王之居也其廩廩之制宜雄盛閱博後世可考而圖記獨稱吳苑倉在苑城內于晉為太倉餘無聞焉苑城今都城也以當時運漬推之于廣濟為近皆距城之西偏外薄于江中則秦淮注焉轉漕之利古今蓋同之于是因廣濟之北徹故官治又告于大將從

旁軍營得地凡百有一十丈為屋八十有四楹度受粟五十萬斛高明曠夷深厚固嚴輸者不勞守者易力然儲材于素市工以直農不去野商不辟塗斧斤齊和丹堊絢煥故新相臨迥出其表中役有沉茂舉于江莫之主名取而用之既巨且良民懷不擾益以歎異始于乾道四年秋九月戊辰冬十有二月甲寅乃告成焉公偉人也其在朝廷嘗為上陳天下大計上命坐反復酬聽率漏下十數刻其輟公之來固不專於奉法令剗煩劇然適疆場無事而獄訟簿書之屬又廓廓無定著故得以其餘力為一方長久之圖自城池邑屋細大畢舉茲其一也公平生慷慨不治財及在官則毅然如他人之私方天子以恭儉先天下乃者郡國以潦聞者衆既優其復除又從而賑廩之而太倉之富自若也公之境人食三鬴亦蠲其入十三蓋君臣之間以儉登濟者如此夫道上德意而采方國之風者使人職也故並記之以昭示來者俾

知富國之道自儉始五年春三月辛未左朝請卽直
顯謨閣權發遣江南東路計度轉運副使公事趙彥
端記左朝奉郎新差權通判楚州軍州
主管學事賜緋魚袋杜易書並題額

平止倉在廣濟倉之左嘉定中留守余公懌建

省創沿江制置使兼知建康府余懌申懌叨守陪都
因去夏水災之後備知此邦雖名為繁庶而民生最
艱素無益藏日食所須仰給商販米舟一日不至米
價卽倍騰踴纔若高糴便至流莩萬一上江歲歉鄰
邦遇糴則狼狽尤甚欲盡濟則事力有限欲平糴則

蓄積無餘以是數十萬之生齒常寄命於泛泛之舟楫而米價低昂之權又倒持於牙儈之手遇災倉皇坐視太息竊嗟到任以來節約妄費財計粗裕即以十五萬緡轉糶他郡隨糶隨糶相續不絕以故商販通民食粗給於是規創一倉名曰平止畫以十五萬緡永充此倉糶本其錢米並委常平倉庫官主掌如有侵移證常平條法施行其倉廩木石堅好造作精緻下砌以磚復鋪以板外繚以牆復包以磚風雨不

侵蒸濕不入委堪耐久其糴糶條目具載須知謹具
申朝廷並以須知冊申繳伏乞指揮劄下建康府遵
守條約證應常平條法不得妄有侵移仍於支承項
目帳內登載以防歲久漏落窠名實為邦民之幸伏
候指揮右劄付建康府從所申事理施行准此嘉定

十七年十二月日押

平止倉須知本府戶口繁庶日食米二千餘石民無蓄藏全仰

客販客舟稀少價即踴貴押之則米不來聽之則民艱食常平纔數千斛府廩又無餘積官既無以持平其權盡出牙僧向來雖屢行招誘之法而勢或有所格雖略有先備之蓄而數以申朝廷伸縮既不由

緩急實無以濟是數十萬之民命常凜凜而無所恃
近日水災諸證備見職思其憂盍爲之計今將當職
到任以來搏節到錢一十五萬貫撥充循環糴本更
不申作朝廷之數賤則糴貴則糴隨糴隨糴循環無
窮推既在我米價自平實爲永久之利今具須知項
下一今創造新倉五廩以平止爲名取李悝所謂使
民適足賈平則止之義一平止倉不許本府及諸司
暫借以開異時無窮之害事當謀始不可不謹一遇
未平則糴糴價視時高下或置場於本府或收糴於
隣郡或於客舟輻輳之時一遇米貴即糴糴價止視
元糴之數一所有元錢收付常平庫本庫官掌之行加
不得過數一糴米錢收付常平庫本庫官掌之一糴
米糴米須擇廉能誠實官吏庶所糴無侵欺濕惡所
糴無夾雜減尅之弊一倉官不專屬廳分但隨時于
職曹官以下選委廉能誠實之人提督出納或廣濟
倉官可委即就委兼管一平止倉合千人已用廣濟

倉人兼充一城內五廂城外二廂已造魚鱗圖以銀
米土米墨字三色標題其委係下戶日糴之家了然
在目恐民居遷移增減不常宜每歲春首編排一次
計口出給歷頭大人日一升小兒半升既糴即於各
戶歷頭內截一某日糴訖印子一每遇糴米於廣濟
倉諸廂置場廂官彈壓般脚之費用省出納之弊易
防一五縣並已如式創造魚鱗圖或遇諸縣糴價再
貴亦當發米賑糴所有船脚錢不可于元糴價上再
加一措置招誘客米先從制司給公據付客人及牒
沿江諸郡勿與遏糴仍劄沿江稅務不得輕收米船
力勝錢及苛留等弊其米船將帶到稅物除將本府
從來收稅則例舊例饒減三分外更與減饒一分客
米官米兩相資助貴糴之患可以常免一如遇客米
稀少市價踴貴憑民戶赴府陳狀出糴願永行之誰
忍廢此竊觀古今之事玩視而不爲暫作而輒廢艱
難創始於前容易隳壞於後此無他人心不同所見

或異不原其作事之初意不念其用心之良苦不以國事爲一體遂爾自分町畦始撫一二事明之湖右湖田幾年議除中間嘗遣使決去矣未幾復興反過其舊屯田之議自中興後上下講明不知其幾淮而漕臣亦既經營成緒卒撓廢于寓公其他庶事不可槩舉未嘗不撫事歎息自顧投老世味日澹豈復有立事取名之心只緣今夏梅霖過多長江上流同時水災故江之下流騰漲尤甚秦淮之河又貫城中江潮大信適助其瀾外水既高內水莫泄遂致公私軍民之居濱于河者悉遭巨浸踰旬不退一時傾帑錢倒廩粟分遣官吏奔走家至以賑之而客販不通牙僧乘時邀利貧民下戶幾至餓殍遂又出常平米減價賑糴甫及旬餘倉吏以匱告亟議遣官吏就永豐圩糴米二萬餘斛又倉猝不能遽至是以苦心勞思創立此倉然自領郡以來秋苗斛面盡行蠲除諸邑二稅以十年所催之數取其酌中年分爲準商稅之

額重加裁減收稅則例至減三分在城回稅永與除
放徵至稅務補虧等錢亦與除去今此糴本錢十五
萬緡皆由克已自律撙節浮費所積非有生財之術
區區述此誠有望于後來體國愛民之君子監其此
心有以維持增廣之
實闔郡生靈之幸

轉般倉淳熙六年置在上水門外淮水北岸置監官一
員

大軍倉在下水門內北接廣濟倉監官一員

平糴倉隸轉運司嘉定八年真公德秀創之民賴其惠
雖歉歲市無貴糴不六七年糴本化爲烏有舊籍無復

存者嘉定十四年岳珂復置未久亦廢淳祐十二年舒

滋復置

嘉定省劄

承議郎權發遣江南東路轉運判官岳珂
中照得本司所管九郡建康留都民物繁

庶絕在下流因船脚道路之遙平時米價最高于它
郡次則徽州岨崕山多田少與廣德小壘俱在水次
不通之地太平寧國山圩田相半高下既殊或旱或
澇難得全熟池州南康雖通水次素少積貯惟饒信
舊來產米却緣溪港夏漲則販鬻貪價多輸泄于下
流歲事或稍不登則秋冬水涸縱使有米接濟亦無
逆水可致之理故非於閒暇時爲之圖度則民食之
慮必軫顧憂珂自祗服馳驅濫書下考適緣商總領
到任釐辦軍儲煩段併發淮上綱運并蒙朝廷指揮
對撥米斛一年之間已及四十一萬八千餘石比之

去年以前雖是軍興年分每歲不過五萬石幾及十倍以此倍費雇發漕計頗費支吾第珂謹守公勤極力裁節浮冗見今庫管錢物比珂到任交承之外幸已有增無虧今珂願以本任內趙積到錢先于本路八州軍撥糴本椿糴米四萬石內建康係會府勢須椿積稍多方可接濟既在珂置司去處容珂一面躬親續行措置增數椿糴別具申聞外八郡各糴五千石起此秋熟委本司主管錢物官逐州通判監糴于本處另教收貯專一充平糴支用見今責領官錢歸各州目下起糴仍委各官每一員催促兩郡往來機察米價催糴限在日近糴足以後年分每歲九月起米出起糴于一兩月內糴足至次年二月以後農務東作日米價長二麥未收之際止照元本價值量搭官吏糜費每石不許過二百文出糴委本司錢物官拘收元本次歲收糴如初如此則壟斷之民每歲乘時開糴要利者必可警戒而青黃不接之際各郡有

五千石之米在市米價自不能長其上件糴米本錢並係珂以本任所積自認包糴候每一郡糴足逐郡具所糴錢米實數供申朝廷將來替滿即不敢侵動元交割前政漕計錢數並行包認登足亦不敢分毫侵動朝廷樁管本司錢米之數伏望鈞慈詳珂所陳事理特與先次劄下本司從申施行仍乞並賜劄下從本司徧牒逐州軍通判照應遵守樁管出納如州郡輒緣它用妄有侵移許本司將當職官具名奏劾乞比擬用朝廷樁管法坐罪公吏仍從決配貴得民間永久均被實惠又申照得珂自申請以後即行分委寧國府南陵縣丞承奉郎張琮徽州歙縣丞從政郎王槐饒州判官承直郎丘葉寧國府監稅從事郎汪教中等官賁發糴本前去逐州軍收糴各五千石節次承諸郡申到別嚴安頓已將及數又續次委本司幹辦公事承直郎李知孝于建康府廣濟倉招糴到米一萬石係一頓先行糴定已行開具供申但照

得上一件米雖係珂任內趙積糴到一司財計本皆朝廷之物却恐諸州于春夏之間爲見係已入朝廷帳內須欲申審不敢擅行支糴及至冬間粒米狼戾又不敢再以元錢趁時收糴上下牽掣橫生顧慮非惟發斂不時豪民壘斷增價自若民不被惠有失平糴之意兼新陳不易積盆久之必有耗折遂成無用深切可惜乞免附朝廷椿管文用從本司今項拘權不拘糴糴月日責在逐州知通常要本錢存在于春夏之間出糴接濟細民冬間仍舊收糴椿積它時緩急亦可備朝廷科撥支遣不致有失指準實九郡民生莫大之幸伏候指揮右劄付江東轉運司從所申事理將今來所糴米五萬石免行收附帳內椿管仍徑自行下所部州郡照應常切遵守施行準此

淳祐省劄

江東路轉運判官兼尚書省提領分司財

用臣舒滋狀奏照對臣猥以非才誤恩將漕嘗拜手
莊誦國史咸平二年詔諸路轉運司申淳化惠民之
制歲豐熟則增價以糴饑歉則減直以糴懿範昭然
以平糴惠民爲先而奉行朝廷仁政者實漕臣之責
竊照參政真德秀將漕江東嘗于建康創平糴倉事
久尋廢自後尚書岳珂撥米一萬石椿留爲建康平
糴之備未幾亦廢近歲尚書陳瓘寓治當塗就荆平
糴而建康司存之地則猶闕焉且建康爲留都會府
兵民繁庶歲事小歉米價易翔即有待哺罄罄之窘
若非官司預爲儲蓄則何以爲水旱之備臣廉朴自
將不敢妄費除交割錢數有增無虧外粗有趨利並
屢次積下米斛因前歲水滂賑糴價錢今就建康府
復置轉運司平糴倉撥糴到米一十萬石般運水脚
倉廩等費約計五百餘萬貫十七界官會內七萬石
椿頓建康府廣濟倉三萬石椿頓寄納倉候起置倉
廩日另項拘椿所積米斛照本司見行體例每歲春

冬兩次賑濟或遇歉歲糶價增長則減直賑糶却將
價錢于秋成措置收糶揔管接續惠民如所部州縣
或以歉告則可以推廣賑卹庶幾江左一路之民俱
被朝廷之實惠所有起蓋倉廩及合行事件從本司
一面措置施行奏聞事照得平糶倉近年以來在在
有之始意未嘗不欲惠民多因官吏非人弊倖百出
或移易他用或妄稱折欠監平人補納反爲民害今
舒運使能以趙剩錢糶米置倉此意亦可嘉尚必須
後人相與扶持毋致侵移作弊專責都吏掌管遇歉
歲則發糶秋成則補還立爲經久規模可也仍月具
數目置冊具申朝廷凡遇新舊交承皆分明登載簿
書同交割帳狀申上庶可拘確免墮前弊合議行下
右副付江東轉運司照所申及點對內
事理疾速措置施行申尚書省准此
咸淳元年七

月馬公光祖判云當使三來開閭昇人愛余余亦愛

昇人公帑所儲毫分不敢妄費思欲爲此邦建一久
遠利益事無如平糴呈撥米價錢差人糴足十萬石
並令創倉廩盛貯續踏逐到舊稻子倉基址鼎新創
造屋四十六間廩一十二座以玉衡正泰階平陰陽
和風雨時十二字爲記專一椿頓上件米十萬石今
開具條畫如后

一照文思院斛造一石斛五斗斛各一十隻斗及連
柄升各二十隻當官較制雕記併造三色籌共一
千五百根發下遇收支
畢拘收本倉不許移用

一于本府三通判中選委一員充提督官凡倉中管鑰一應事務任責提督所有合差機察倉官一負專任出納之責請提督官于本府職曹官中選差能事者充之以才不以序仍專差都吏充統轄拘確收支專一任責補糴每年須管數足

一每遇青黃不交市糴驟貴先喚上牙人供具時直實價却于時價中減價二分出糴謂如時價每石二十貫則減作十六貫之類若時價頗貴又任臨時斟酌痛減

一出糴必減時價却恐米數因此銷折今別撥十八界會一十萬貫置解庫一所名曰咸淳助糴庫則例並依本府解庫起出息錢專充補糴管要糴足十萬石之數若歲久息羨則增數收糴

一天時不常豐歉難必設遇歲饑當行賑濟本府自有區處不許將本倉米及助糴庫錢作賑濟支移

一此米本以濟艱糴纔遇價貴便當出糴却不可過慮補糴之難從而稍縮今州縣常平米亦多是官司不肯擔負以致陳積腐壞反爲公私之累今既有庫息裨助則補糴不難但有一說若遇豐年發糴不盡未免有陳倉灰蛀之患合用以新易陳今着爲例如有糴不盡米從本府作軍糧支遣却于輸納秋苗時撥數就倉交納盤量抵還庶幾此米常新亦免般擔勞費

一糴在春夏糴在秋冬糴到本錢須是拘檮有所今仰提督機察官將糴到錢即日拘上寄收常平庫令置簿籍必糴米方支如

有分文移易並依常平法

一出糴照本府甲牌戶口三日一次每大口五升小口三升憑由交錢給米具有經紀小民於當糴日分湊錢不上或出外他幹未曾收糴者許于後次一併補糴不許邀阻

一甲牌戶或有遷移或口數增減或貧富升降請提督官行下各廂每季從實抄具結狀保明仍不時覈實如有欺弊廂官對移廂吏重斷仍許人陳訴

一出糶合分場分以防壅併城內分六場城外分四場各就寺觀廟宇寬閑去處東廊交錢西廊糶米庶免壅併之患

一出糶每場委監官一員吏人庫子糾子各一名十場分作兩日每日各支點心錢監官一貫轎番等

人共二貫吏人庫子糾子各六百文十八界

一置場糶米撥斛接手等人寧無糜費若官司不與區處則必漁取于客販之人所合照苗倉官拘錢例斟酌裁減除倉官免支外每石計支糜費六十文十八界但苗倉則取之於納戶本倉却不當取

之于糴戶今從助糴庫息錢內每年照所糴客米數稟支此只是防其漁取糴戶耳若本府自于諸司回糴却不當支專知一十文攢司貼司共六文斗衆二十文脚夫等一十文門司二文門子一文請匙匣一文

一在倉之米以新易陳固無十分耗折但米之蛀腐多在經霉之際却是四月以後糴不盡之米直待新穀登場方可換易此時則不能無些少耗折創立之始若不曲盡其慮却恐向後日積月累耗折必多其流弊必至于入則取贏斛面出則減尅斛面以補不足豈不有失初意今立爲定式凡糴到之米自次年四月以後未曾支糴者每石與豁耗折一升

一前項雜支並于解庫趲到息錢支給

平糴倉落成設醮青詞聚粟積倉懼民飢之由已獻
花酌水冀天聽之鑒表蠲潔落成屏營望賜伏念臣
某久司漢鑰檢察昇叱未作成風於服田乎何有窮
閭待哺惟艱食之是憂力搏公餘創儲平糴粒粒皆
出于辛苦家家期遂于飽溫必求與惠之旁周更賴
後人之增廣念吏有時而代去孰守成規惟心與帝
以相通庶幾永保願鑒老臣之經始曲綏民命以圖
終億祚既豐千燈相續崇墉粟將百載以常存多
泰陳陳無一夫之不獲門牌詩人人飽吃昇州飯
世世常存老守心記云我朝本仁立國置常平倉
與義倉並益以取民者還以予民作法良矣歲久蠹
於支移隱謾吏持空鑰相授受部使者一詰治之抹
連不幸而銖粒弗可得易地通患幾以養人者害人
矣天時不齊豐儉迭異趙清獻富文忠寂寂笑人地
下民有遇荒而莫之救以死間有爲平糴者視飢由
已豐而入歉而出較元直無取贏或可助常平義倉

之不及庚寅辛卯余令于越年饑勸分不遺餘力僅活疲羸既又諭大家贊助倣平糶備先具凡得我心之同然者掎應響應集爲斛四千計公家之積與大家所益略相半余嘗諭于西山真公喜爲記巔末會余去弗繼而直幸存後一二紀間遇水灾邑人藉以糶運寶祐初余守當塗儲粟二萬亦盡吾心焉耳矣陪京生齒甲江左歲一告稔操瓢乞食恤恤莫之適饒商饗僧簸箕權以乘其急而糶價翔不能遏郡大夫瞪視喑莫敢下禁切之令幾若負牧芻之寄者余心憫焉載稽往牒名存實歎儻平糶所儲纔三萬昇數百萬家脫值緩急杯水救興薪之燎憂憂乎何以制其昂而抑其踴也迺縮汎節浮糶七萬斛通舊積合爲一十萬度地建屋以廩以峙扁曰咸淳平糶倉又輟芝楮二十萬立助糶庫歲取息以補其價之折閱官吏斗級簿書糜費給各有式然余志不于是盡也增益相因至去乃止告成之日揭虔額天願俾勿

壞於戲天地生物之德祖宗立國之仁均是心耳余雖不敏獨於昇人有緣余愛其民民亦愛予今承乏三矣老至而耄及之行且乞身去所以爲此邦計者惟是心在天下事莫難于經始亦莫難于繼成其嗣今與我同志者庶維持于不壞不減而後可昔復村劉公嘗創平糶于浦城西山記之曰必秉彛盡亡而後此倉可廢噫此心法也惻隱之心人皆有之心相印得無望于後之人後村書倉門兩扉曰且與吾民留飯碗豈無來者續心燈余于是倉亦云咸淳二年正月十五日記觀文殿學士金紫光祿大夫沿江制置大使兼知建康軍府事兼管內勸農營田使兼江南東路安撫大使馬步軍都總管兼行宮留守節制和州無爲軍安慶府三郡屯田使金華郡開國公食邑四千一百戶食寶封八百戶馬光祖撰並書朝奉大夫秘閣修撰江南東路計度轉運副使兼本路勸農使借紫趙孟頫篆蓋王積翁賦稷思堂頌皇

帝即位之明年改元咸淳上詔藩侯以下爲朕培植
根本大使同知馬公治昇尤于根本注意築廩儲粟
揭之曰咸淳平糴倉揚休命也扁給事之廳曰稷思
堂示不忘民也公三握麟符懷忱秉忠臧感惡服自
昧爽至中晨涖事無懈容公之思深矣夫思者天理
之所存民胞物與之體驗也稷思天下之飢猶已飢
之稷何爲汲汲哉解於其思天理流行有不容不然
者公慨思陪都生齒益蕃忽歲稔即艱糴廼縮浮費
得米十萬石作室廩峙練吉告成青紅濕新攀星納
月公之思其少遂矣乎汝別駕治其凡汝即功曹司
其出納以才不以序約法斂散侵移有罰公之思其
周悉矣乎日者春頒秋斂有旅師馬恤民難厄有遺
人馬辦穀待用有廩人馬藏餘待頒有倉人馬周公
之制度可謂詳矣孟子曰周公思兼三王其有不合
者仰而思之其入周公之思久矣南軒謂惟孟子此
篇能發明周公之心然則后稷奏艱食稷之思也周

公制委積周公之思也公之置平糴公之思也嗟夫
稷以民飢而思民公以思民而思稷所思以名斯堂
不亦宜乎門生王積翁採諸民風爲之頌曰
厥初生民維汝后稷思天下飢教民播穰其思伊何
心起經綸阻飢由已痒痾切身農事開國周重斂散
运用康年魚麗晏粢平糴蕃魏曰惟爾惺壽昌之規
漢人便之我宋義倉徧於天下平準之法創於淳化
熙豐柄臣過思變更元祐及思蒼生以寧雀鼠遯肥
塵沙積厲豈不爾思公私交累陪京故國翠華大都
聚廬實繁孰懷永圖北平鉅公三尹東土甌脫旣清
綢繆牖戶乃積乃倉立粟埋梁不負爾腹以永益藏
堂曰稷思維公初意我思民飢心焉不置心心相續
如佛傳燈剡獎益匱以莫不增后稷云遠萬年胥契
今之視稷後猶今視嘉祐廣惠朱子社倉前思魏公
後思紫陽公將告歸帝曰未老天相耆後過中後記
書考惟仁必壽惟德永年昇人歌之作此頌焉後記

云余之三至金陵也欲為邦人創平糴一倉積米十萬斛夏糴冬糴以濟乏食自咸淳乙丑秋七月至丙寅春正月共得七萬石事力僅僅弗克繼則以前帥王公埜所蓄三萬斛足成之且識之曰倘未即去不以是畫今自二月以迄八月再糴三萬合為十萬而王公舊積不與焉蓋其初已申朝廷椿管不欲混此數也夫出糴之價微損固足以見惠養之心收糴之價不常則不可無變通之法此助糴庫所由設也庫始為本芝楮二十萬今陸續增至八十五萬雖然猶未也積累充廣歲衍月益俾所入常有加于今日則此庫不為無助毋已則糴價但可畧減不可用今日之例減之太驟以致後日難補若夫報有餘以助不足使十萬斛之數永永無墜不無望三記云平糴于後之人是歲重陽日馬光祖謹書

設自咸淳乙丑七月至丙寅正月得米七萬石又自二月至八月再得三萬石合為十萬石余嘗記其畧

矣丁卯冬糴二萬石而爲十二萬戊辰春再糴三萬
總而爲十五萬如難哺雖勺積餽累所以及此數者
偶值歲稔司造實嘉相之然爲是倉深長之慮有二
焉其一餘米不可久頓當以新易陳庶米色常新而
民被實惠其二糴之價常損糴之價常多恐異時措
置糴本之艱有折閱合額之患于是先創助糴一庫
爲本百萬收息補糴又懼其所入之微也則再創西
庫以佐之合兩庫爲本二百萬然余志猶未愜也輟
郡帑之有餘助兩庫之不足俾是倉是庫相爲無窮
則余雖去猶不去也咸淳戊辰夏五上澣光祖書

制置司倉附本府廣濟倉內又有小倉三所曰東倉
曰西倉曰中倉並在南門裡沙窩一帶

古苑倉吳大帝赤烏三年使御史却儉鑿城西南自秦

淮北抵倉城名運瀆

按實錄宮城即吳苑城城內有倉名曰苑倉故開此瀆通運于倉所

時人亦呼曰苑倉瀆

咸和中修苑城惟倉不毀故名太倉在西華

門內道全宮城之西北

古太倉晉咸和中蘇峻反王師連敗績時太倉惟有燒

餘米數石以供御膳太倉在苑城內亦曰苑倉

乾道中趙公彥

端廣濟新倉記云圖記獨稱吳苑倉在苑城內於晉為太倉餘無聞焉此蓋未考也

古龍首倉按隋食貨志京都有龍首倉即石頭津倉也

臺城內倉常平倉東官倉所貯不過五十萬

古東倉唐六典云東晉有東倉石頭倉

古石頭倉在石頭城內吳置晉曰常平倉南朝因之唐

武后徙縣倉以實石頭神龍二年移倉于冶城

晉史庾翼傳云

往年偷石頭倉米一百萬石皆是豪將輩而直打穀倉暫監以塞責咸和二年蘇峻逼遷天子于石頭以倉屋為宮梁侯景破臺城食石頭常平倉既盡便掠居人爾後米一石七八萬錢人相食通典云晉曰常平倉自後無聞梁亦曰常平倉不糴糶陳因之古跡編云唐武后先宅中徐敬業舉兵使其徒崔洪渡江修石頭城以拒守敬業平置為鎮仍徙縣倉以實之神龍二年廢鎮即移倉于冶城何遜石頭城詩曰萬雉極衿帶億庾兼量出蓋謂此也

制使姚公希得任內增創轉般倉轉般置倉昉于淳熙
爲屋不多歲久損敝景定壬戌制司及本府共創修
三十座殿屋

制司修一十五座止是因舊修整用工不多其殿眼
以寒來暑往秋收冬藏閏餘成歲金生麗水號應副
盛貯朝廷所撥米斛自景定三年六月十六日興工
至當年八月二十八日畢工共費錢四萬五千三百
三十五貫有奇

本府創修一十五座其鼎新創葢一十一座殿眼以
天地元黃宇宙洪日月盈昃爲號增修舊來四座殿
眼以辰宿列張爲號自景定三年十月十六日興工
至次年五月十三日畢除朝廷科降一十五萬貫米
三百石外本府實增用三十九萬九千五百餘緡米
九百一十石有奇

重修府倉景定四年鼎新修創八月初四日興工至五
年正月初八日畢殿屋計二十四座以天地元黃宇

宙洪荒日月盈昃劍號巨闕珠稱夜光果珍李柰爲
號總費錢一十五萬七千四百七十餘緡米一百一
十二石有奇

大使馬公光祖咸淳二年四月內重修建康府城下倉
更名廣儲糜錢十八界四萬四千有奇米二百六十
石有奇

創制司倉制司米舊附廣儲倉咸淳元年四月內即廣
儲倉側隙地令蓋制司倉爲殿四前後屋共三十一

間縻錢三萬九千九百餘貫十八界

諸庫

聖節從物庫在府治西廊

節儀庫在玉麟堂東廊

椿積庫凡四所一在府治一在府治之南劉公珙建一

在府治東陳公俊卿建一在府治東南錢公良臣建

都錢庫在府僉廳之北常平庫軍資庫節制庫修造庫

節用庫經總制庫公使庫皆附焉

禮尚庫在府治西廳馬公光祖立家之異為記

開慶元年夏四

月建康府創禮尚庫何以書始也初府號陪京地大物多諸司錯立守臣以制置使掌留鑰冠冕諸閭歲時慶勞賓餞講信修贄相望于道報施視儀公出私入以故說者謂天下禮餽之盛首蜀次金陵筆之私史誇以為異實祐乙卯裕齋先生金華馬公以戶部尚書來鎮至之日首斥供帳器幣以賜戰士諸餽遺率適易以報纖毫弗入私帑又四年復以資政殿學士自京湖再鎮規置視前有加一日歎曰互饋當禁人謂吾矯奈何迺即治寺西偏闢屋數楹哀他所致籍入而吏掌之若緡錢若帑帛百物悉輦以輸暨報也即取于是撫戴記禮尚往來之語扁曰禮尚庫成謂門人眉山家之異曰爾為我識之之異自惟生晚筆弱何足以知公盛德鉅美嘗恨世降道微廉恥不立蓋有流俗非義之事而士大夫習熟見聞以為

當然恬莫之怪往往依託事理覆蓋其迹迹是心非
名正實則恃區區之饋諉曰人情之常惡可以已弗
思我施彼報曾不旋踵交手畀付如取諸寄其與攫
而懷括而囊者幾何無他一自欺之心為之耳非公
特立獨行一介不取孰能返之正而示之法哉蓋公少
從西山真公講道授大學誠意毋自欺之旨平生事
君治民修身範物皆得諸此上嘗大書忠實不欺之
堂六字以賜咸謂稱情是庫之設蓋亦不欺之餘事
也先是清獻崔公文節楊公亦惡禮饋然規模未立
美意弗嗣禮尚有庫斷自公始事雖小于人心世教
有闕遂拜手以書景定元年十月朔旦門生承事郎
特改差充沿江制置大使司幹辦公事家之異謹記

公使酒庫在天津橋側馬公光祖重建唐燦為記

開慶改元

四月丙子制置大使留守資政馬公復建江閫燦以
文郡掾黃制幙公間府政事前二三年修舉矣獨公

使酒庫未暇及越六日辛巳迺命爍曰酒百禮之行也公家日用已飭吏任責汝其典司之越十日辛卯特枉牙纛親莅庫所度地下窄視屋欹斜又命爍曰庫百物之藏也因仍架陋如欺弊何汝其改作之繇是捐資以闢地聚材以興工若外若內一撤而新大門公廳皆北嚮廳之後則酒官便室也門之前則神宇吏舍也周遭于其左則麴米物之廩七醴三色棧之庫也而又附以碓米之屋綿亘于其右則列竈攤饋之場醕酒供筵棧之庫也而又加以滌甕浸米之所若井亭若糟池規創具備惟聯屬于後名醕庫者因舊而葺爾為屋凡七十間限以窓戶甃以磚石飾以丹雘他如鐵冶鑊之鑄柴栢酢之造動用甕具凡三百餘靡不堅固精緻經始于四月壬辰考成于七月乙卯工計備二萬一千二百十楮緡十萬二千六百米計石五百二十六匠以民價雇而不抑差物以市直收而不科擾方廳事之成也公再蒞庫所大書

六必二字揭之摺間實取呂令命用六物之義及工役之畢也又至庫廳而申命曰庫新矣酒令其新乎有門戶以嚴出內有庫舍以謹蓋藏有器物以足用度繼是則酒官之責也夫酒一事耳古人兼用六物必無差貸其精且詳如此況有大於酒政者乎然則職斯庫惟斯義其必毋懈怠毋苟簡毋不屑經意事奉勤謹物物精潔庶乎泉香酒冽可以共祭祀可以奉燕饗可以行賜頒斯無負公造庫命名之意云歲中秋日門生從事郎太平州軍事叛官兼沿江制置大使司僉廳唐燦謹記

醋庫三所一在舊米市一在安樂廬側一在鑿子巷

雜物庫在軍器庫側

鞍轡庫在節儀庫側

淮士典庫在大木頭街

封樁甲仗庫在大軍庫東

古石頭庫

吳都賦云戍東盈于石頭注云石頭城中置府庫貯軍儲故曰盈于石頭

今廢

右隸建康府

制司庫在府治都錢庫內

都受給庫在軍器庫側

軍器庫在經武橋東寶祐五年馬公光祖修舊增新申

嚴約束

勘層軍器庫前此蠹弊百出漫不可考本司委官將在庫器甲衣裝等逐一分別好怯作三等

排垛內天字號係創造新修地字號係堪中支遣人
字號係略損當修重新置籍各關防出納申嚴火禁
創置防虞約束監攢之類刊鑲版勝釘掛庫廳務令
經久可守今開劃下項一出納軍器前此俱有情弊
謂如以堪好者開出而以損弊者交入又有支受之
時必索需索堆積廷下兼旬累月得錢即交不得錢
則百般作難軍人貧寒何所從出本司今既一新規
模必更痛戒此弊已榜曉示門外許被擾人指實陳
告定追究犯人重作施行諸軍交納軍器若非元物
即是情弊其雖有損污去處而本是元物者合即交
受添修不許邀阻一前此軍器走失皆自提點官不
曾躬親下庫出納及蕩無門禁之故合于庫前新創
提點官廨宇一所既便于監臨又置門司一員貼門
一人專一檢視出入庶幾可以革弊已榜曉示庫門
其有輒盜一物一件者並從軍法一遇出戍回戍教
閱收支多者委制幕一員同共監視自餘委提點官

一防虞器具十石缸三十隻提水桶五十隻扯水桶
一十隻麻搭二十個料杓二十箇鈎刀一十把大長
梯四連大索二條鐵貓兒二箇大斧四具大鋸二連
以上並排列庫廳一防虞官兵三十人係就教場防
虞人內差撥專一在庫逐夜分鋪知更提鈴循環外
又差合千人一名充部轄一每夜于發更前請提點
官將本庫職掌庫子防虞等人先次點名畢然後開
下門鎖如有不到之人即仰具申重作施行其本庫
合千人雖隸提點官却不許使供私役本司亦不測
差人撞點一在庫一應合千等人並不許帶火入門
遇夜亦不許點照燈燭責在守宿監官常切點檢如
違一例坐罪一庫內烘焙弓弩並請提點官早晚監
視入爐開列火力炭數如后春秋兩季火力七分四
十爐每一爐日支炭一斤四兩炭壑六箇夏季火力
十分四十爐每一爐日支炭二斤炭壑八箇冬季火
力五分四十爐每一爐日支炭一斤炭壑四箇一弓

弩庫眼既有火烙與他庫眼不同每夜須責庫子入庫守宿照管所有鑰匙令作一匣盛貯親行當宿監官取掌以防緩急次早仍納提照廳一庫子舊例每名日支錢三貫文飯食係各人自造本司既嚴火禁遂自四月初一日為始行下火隊照作院工匠例每名日支鹽菜錢一百三十文米二升做造飯食支散一各庫置庫口簿一扇將已排照衣甲軍裝等逐一抄上遇有收支每五日一次結轉請提督官僉押一月一次轉止總簿赴使廳呈押一增創暑往字號庫屋共六間計用工物錢三萬二千三百五十二貫文一新創提照官廨宇一座創造門樓廳堂屋宇共一十七間並在下裝修床榻等及週迴牆圍木植磚瓦計用工物錢一萬六千四百一十五文

回易庫在斗門橋西

抵當兩庫一在御街錦繡坊之南一在寬征坊

惠軍典庫在十三大街

右隸沿江置制司

軍需庫係安撫司庫在軍資庫之側

防江靖安兩酒庫元隸安撫司錢入

軍需庫乾道八年將建康府酒庫並撥歸提領戶部酒庫所包認本司兩庫酒息錢每月以乾道七年息錢數為額成年計五萬七千三百七十一貫五百九十五文分十二箇月取撥入本司軍需庫收附支遺續永提領所牒報起辦不數于本司息錢元額權減四分之一每月撥到三千八百八十九貫一百八十四文
本司元有抵當庫將錢本舉借應副猪羊牙戶從便打發猪羊客人收息解發續於乾道八年六

月內建康府置庫用本並從本府猪羊打發務依舊
物收息錢每日分隸解納本司軍需庫交納每月共
收三千一百餘貫文昨自前政吳大資任內于淳祐
十年正月一日省廢所有上項課利錢本府却以收
到外三縣酒稅錢內照淳祐九年收赴錢數撥解本
司成年共收八千三百一十三貫五百文十八界會
分作四季撥入本司軍需庫收附支遣本司親兵
雪窖二所坐落城北門外遇冬月差撥官兵收藏冰
雪至夏日變賣收錢入軍需庫若二窖十分平滿除
公用支遣外自餘約賣錢三千貫文十八界添貼支
遣本司近于實祐六年十月內蒙前政趙觀文以
本司財賦匱乏支遣不敷遂于沿江大制司常平酒
坊內分隸奉橋新昌徐莊錢村四坊撥付本司每月
共得息錢七百二十貫文十八界續于開慶元年五
月內蒙安撫馬大資再撥新城吳材兩坊息錢二百
二十四貫文十八界其錢制司徑自催理只將乾息

錢撥入本司軍需庫支遣官屬
月給此安撫司財計之大略也

右隸江東安撫司

大軍庫在總領所東

都錢庫在大軍庫西廊

激犒庫在大軍庫東廊

椿備庫在都錢庫之側

抵當二庫一在舊米市一在雞行街

公使庫在總領所西廳之西

見錢庫在飲虹橋下保寧坊之西

右隸淮西總領所

錢物庫在轉運司東與花園相對

雜物庫在大廳西廊

公使庫在雜物庫側

典庫在轉運司衙之東

右隸江東轉運司

鳳臺酒庫在天津橋之南

鎮淮酒庫在御街建業坊相對

嘉會酒庫在大木頭街

豐裕酒庫在南門外西街

龍灣酒庫在龍灣市

防江酒庫在北門外

東酒庫在上元縣之西

北酒庫在太平橋之南

右隸戶部提領酒庫所

務場

權貨務舊在總領衙西今改為總所屬官廨宇

雜買務舊在總領衙東南今廢

市易務舊在新橋南今廢

平準務舊在御街東今廢

秤斗務舊在壽寧寺西今改為屬官廨宇

都稅務在寬征坊董河下

夏稅物實場在府治設廳側

受給修造場在頌春亭側

雜賣場二所一在東南佳麗樓東隸制置司一在東南佳麗樓西隸總領所馬公光祖立

都船場在龍灣

柴場三所一在城隍廟側一在龍光門外一在朝宗坊之西

菱草場在東門外轉般倉側

竹木場在府社壇東

王沙稅務在靖安鎮

抽分場在靖安鎮

藥局

安撫司惠民局在府治西淳祐十一年十月馬公光祖

創撥藥本收藥材委官提督監視修製置四鋪發藥應

濟軍民收本錢不取息

一在天津橋南一在銀行街
一在鎮淮橋側一在靖安鎮

總領所惠民局在正廳東廊置五鋪發賣

一在本所衙門東南一在

太平橋南一在銀行街一在
鳳臺坊口一在御衛長樂坊

都統司惠民局在都統衙內橋亭東置二鋪發賣

一在天津

橋南一在
太平橋南

雪窖

行宮雪窖在城東門外

安撫司雪窖在城北門外

防江軍雪窖在雞籠山之側

都統司雪窖在城北門外

犴獄

左司理院在府治大門裏之右通叛西廳之後

右司理院在府治大門裏之右知錄廳之後

直司在府治都僉廳門裏

總廂在府門外西南

兵馬司在効一營內

土牢在馬軍營內

上元縣獄在縣治西偏

江寧縣獄在縣治西偏

營寨

侍衛馬軍凡六軍四軍屯城南一軍屯城東一軍屯府治西北與都統司諸軍參錯如古南北軍之制乾道七年移屯每軍有統制統領出三衛馬帥以領之號行司選鋒軍在城西門崇道橋

前軍在城南門外虎頭山

右軍在城南門外黃家塘北

中軍在城南門外黃家塘南

左軍在城南門外陰山之東

後軍在城東門外蔣山南

駐劄御前諸軍凡六軍列於城之內外紹興十二年移屯每軍有統制統領官置都統制副都統制以領之

遊奕軍在壯新街清化坊

前軍在桐樹灣以北

右軍在高陽樓及城東門外

中軍在保寧寺街

左軍在北門裏大街東

後軍在上元縣西景陽臺南

廂禁軍營舊皆茅廬紹熙中章公森盡易為瓦屋數千間號曰新營其隸冊籍者始不與居民雜比有詔獎諭

禁軍

武雄第一指揮在廣濟新倉東

威果第十三指揮在行宮北證聖院西

威果第十四指揮在證聖院東

威果第十五指揮附威果第十四營

全捷第六指揮附威果第十四營

忠節第十一指揮附威果第十三營

威果第四十四指揮在轉運衙西

全捷第十一指揮在太平橋北

有馬雄略第十一指揮在清化市南下街西

橫江水軍三指揮一軍附威果四十四營

附有馬雄略營一軍附全捷十一營

忠義指揮在總領衙後

廂軍

効勇第一指揮

効勇第二指揮

牢城第一指揮

牢城第二指揮

剩員指揮一營以上並坐落在城內西北隅

沿江制置司諸軍寨

遊擊軍寨五所寶祐四年馬大使光祖建

前軍在武定橋南

右軍在北門內

中軍在桃源洞

左軍在武定橋西北

後軍在桃源洞

寨記

寶祐柔兆執徐正歲之三日制置使尚書馬公受命募兵賞明令修遠邇悅來越三月得嫖姚

之士三千三百人辟諸營以舍之薪楚鹽酪床榻釜甑不勻而有亦既協厥居矣公猶以為人不根著怛

然未有嘆志迺周爰相度得故營地于武定橋之東
而胥宇焉謂通川崔君泰亨鎮密而莊謂新安汪君
洵之明達以敏皆機士使耦往彼淮其事實塋實屋
百工皆作木章竹个葦把釘枝當其直而取秋毫不
以符移賦諸下酒肉淋漓旬犒月飲士夫豫附竟役
不施一簣虹見而作駟見而畢凡斥幣百四十萬緡
規地六百三十丈結屋三千二百楹而皆有畸南北
其檐巷以集于中道衡從其道門以達于四達鞠旅
有序習射有圃祠兵有官將軍偏裨各以資序授室
井乎如田之洫屹乎如山之阿江以南營壘將無與
雁行者嗟夫仁者之迹煌固有俟曲體于高明風雨
其人而莫之隱者仁隱之勇不能赴之則或悶于難
勇赴之智不能周之則或愆于素君子謂是役也居
約而施溥時融而舉贏工堅而事速建一營三物成
矣是月既望公載酒肴名僚佐相與落之或執簡請
記成事公曰吾惡夫詡者末之記也有誤而對曰公

經營是以整比予士非以為誦也其亦使士于此焉
居則肆戎經出則敵王愾入則効首虜豈其即安而
弛勞委公貺于草莽耶庸勸之以斯文俾勿情而非
以為誦也乃記門生朝奉郎特差充沿江制置使司
叅議官胡居仁撰門生從政郎差充沿江制置使司
幹辦公事梁椅書門生通直郎添差沿江制置使司
主管機宜文字
汪洵之篆蓋

遊擊軍新寨在馬帥衙之東開慶元年馬大使光祖
招填增刺新軍日多遂復建此寨以處之倍直買
民地拓基周廣五百二十畝有奇選委本司主管
機宜文字徐道隆幹辦公事林子藹董其事制帳

總統王雄提舉官張勝佐之是年五月經始明年
三月告成宏曠高爽甲于諸營下至床榻釜甌莫
不畢備寨屋三千間制領將佐衙共一十一座計
一百三十二間點亭廟宇寨門共四十一間甃井
二十五所並造井亭一十二間

防江軍寨在城北門外耆闍山下

効用軍寨三所一在府直街能仁寺後一在武定橋
南又小寨在羅帛市

破敵軍寨在大西門裏

精統軍寨在都統衙後

親兵左右部在鹿苑寺側

策勝軍寨中軍在城裏東北角右軍在北門城內

制効軍寨二所一在城南門外虎頭山一在城裏杏

花村

龍灣遊擊水軍寨在靖安鎮

靖安唐灣水軍寨在古龍灣茆草岡

義士軍在遊擊中左後三軍屯泊

雄武軍在北門遊擊軍屯泊景定二年分屯宜城

江東安撫司親兵寨

乾道五年史公正志建在府治東後廢淳熙初劉公

珙復建為兩寨一在官城東一在官城北慶元初張

公杓重建

寨記

江東安撫使司置親兵千人本乾道五年侍郎史公奏建康留鑰之地控制淮甸雖宿重師而

帥間弗容弛備乞通還本路禁兵至建康期一更戍遂建寨北門外九年有旨發還獨選建康兵足之淳

熙二年樞密劉公復奏即城中為二寨用便閱習雖千夫之聚其招與輯皆先以聞國朝軍旅其重如此慶元乙卯春實文閣學士尚書廣漢張公自襄陽移鎮下車布宣教令盜賊衰息蠲逋賑荒田里舒泰民事既舉乃修軍政初劉公徙北門之營因舊綴補歲久腐壞風雨之夜棟橡伊軋卧者皆懼夏大雨屋十楹一旦仆地尚書命九言督視撤舊國新統領崔彥使臣李榮率將校李保劉喜蘇俊分掌役事使臣徐升率軍典王承吏魏輔掌受給材植百物軍典李瓊尉辛管金穀吏羅演宋繼先司案籍為軍房甲仗庫合千二百八十七楹又建亭為主將號令點集之所夫軍旅非徒習為分合刺射而已將教之出相須入相避同隊相親同營相和然後可以事其上昔晉侯觀師于有莘曰少長有禮可用也因名東亭曰觀禮西曰教忠俾士卒識所趨嚮亦以告馭軍者知訓齊本末之叙云十月承直郎幹辦公事游九言記

淮西江東總領所總効軍寨四所

一在江寧縣北真聖廟南

一在興嚴寺北

一在馬司選鋒營東

一在報恩觀東北

廬院

齊六疾館齊文惠太子與竟陵王子良立六疾館以收

養窮民

梁孤獨園梁武帝普通二年於建康置孤獨園以養窮民

養濟院在宋興寺嘉定五年黃公度創今為居養院

省劄

知建康府兼江淮制置使黃度奏臣伏見中興會要紹興七年高宗皇帝駐蹕金陵閏十月詔

以天氣寒凍貧民乞丐令建康府疾速踏逐舍屋于戶部支撥錢米依臨安府例支散候就緒日申取朝廷指揮收養竊惟不廢困窮列聖家法嘉祐熙寧次第增廣上自京師外及州縣或給戶絕官田或出常平錢粟載在史官前後可攷而高宗皇帝于多事倥偬日不暇給之時閔民三窮亦捐大農錢米以贍之其所以續天地生生之德者與祖宗同一心也臣猥以非才濫司留鑰適當旱蝗饑饉之後流離餓莩充

徧城邑幾不從視賴朝廷德澤賜緡轉粟極其贍厄
闔境生靈免填溝壑莫不銜戴上恩歌詠鼓舞惟是
流移貧民養于僧廬者凡三千四百餘人去歲麥稔
擇其稍壯者與之果糧散遣歸業而孤寡老疾之人
存者尚衆臣遵奉高宗貽孫之長謀推廣仁主發施
之德政府城舊有養濟院前守臣錢良臣始為規撫
未廣收養不多臣遂于城南北創兩養濟院為屋舍
百間每院各度一僧掌之所養貧民以五百人為額
春夏則稍汰去每歲用米一千五百斛其千斛取辦
于常平五百斛從府倉耗米挪撥費錢二千緡則取
諸安撫司惠民藥局息錢出納稽核選僚吏以董之
又得廢寺曰宋興擇僧住持總督其事取民產之沒
於官者為田五百九十畝山地等五百十有九畝以
供億僧徒又捐千緡就寺置質庫計其所贏每三歲
買祠牒度營幹有勞行者一人為僧嗣掌兩院事務
凡窮民寒則為之衣病則予之藥歿則為之葬埋條

畫區處粗為周悉留都繁會之地四方失所流徙之民往往多聚於此皆無作業每遇隆冬凜冽之時米價稍貴則號寒啼飢暴露枯痺所在成羣非都邑氣象自今以往皆得安居飽食不復宛轉于市井捐瘠于道途懼其時改歲遷來者不繼則所撥錢米或遂中輟所置屋廬漸至頽毀是用不避屑賈冒昧以聞敢望聖慈特降審旨行下建康府及江東安撫常平司常切遵守所給錢米每歲照數取撥毋得輒廢庶幾德澤深長與國同久干冒宸旒臣無任恐懼之至伏候敕旨貼黃常平米係每歲給養孤老米內分撥藥息錢係藥局收到即非解發官司等處錢柴蘆子建康府公使庫歲時柴內支取並無侵公私去處伏乞審照三月六日奉聖旨依右劉付建康府準此黃度跋云度守留都之二年歲比有秋瘡痍浸復思廣上施爰及今人共惟祖宗至仁同符三代在郡國實有養濟之政高宗駐蹕詔旨如丹迺斥幣餘營室

廬而養食之董以緇流區畫織悉拜疏上聞蒙恩詔可聖主視民如傷光昭祖武嗚呼休哉事適權輿條理未密豐凶歲異所養不齊則緝熙上恩敷錫無告異時牧守必同此心敬以德意載之于石嘉定五年歲在壬申七月既望實謨閣直學士朝議大夫知建康軍府事充江南東路安撫使兼行官留守司公事兼江淮制置使黃度謹題管轄僧智壽立石

寶祐五年馬公光祖增葺居

養院備其器用優其衣食廣其收養

榜云照得居養院創制有年

小租入旱澇相繼雖有疲瘵殘疾之人無以為養廂分不與申收大失始意今接續支撥錢米下院給造衣食行下各廂根刷中解一項院內見養窮民冬寒添置布襖袴絮被薦蓆內襖袴添支新綿作純綿胎做造襖袴結散一項諸廂孤貧老弱殘疾行丐之人自入冬以來行下各廂節次根刷到三百餘人並送

院養贍仍接
續根刷申解

安樂廬二所皆馬公先祖所立一在北門高陽樓側實

祐四年所創也一在御街西醋庫後開慶元年所遷也

創廬規式照對本府係軍民雜處商旅往來之衝間
有病于道途者既無家可歸客店又不停着無醫無
藥傾于非命極為可念當使昨守當達日嘗遵叅政
真文忠公帥潭口規式創安樂廬收養病人凡行旅
在途及傳遞過軍罪囚等應有疾病並許經提督官
自陳書時收入差醫命藥全活甚衆本府今做上項
規式于城北門裏創置到安樂廬一所擇僧看守命
醫診視錢糧成料給之倉庫湯藥隨證取之官局床
榻器具一一齊備庀湔沐浴各有其所高明整潔務
使至者如歸今開具規式如後一軍民在路遇疾往

往客店戶惡其擾人又慮傳染多是不肯安着本府已告示城內外客店戶並軍巡地方遇有經過人病患仰即時具狀經提督官隨即押下差醫人診視給藥醫治一諸司及隣郡傳送到過軍等處有不測病患仰防押人即時具狀經提督廳押下醫治仍仰元押人同共看視監管一兩獄或有罪囚不測病患亦仰推獄具申本府取判押下醫治仍責本牢獄子同共看視監管一病人入廬即時差當月醫官診視脈息證候其合用藥餌經提督廳點對批歷赴安撫司藥局支請責付醫人並看守僧如法煎煮服餌一病人入廬合用粥米已置厯成料闕請每病人一名日支白米一升柴炭錢三百按日支給若病重不食者仰分明報聞其病愈能食之人請提督官契勘量添半升勿令失飽傷飽反致成疾其專典等人減剋作弊全在提督官覺察錢米料盡接續申關病愈之人無力可歸者計其遠近量給錢米津送出廬一病人

入廬廬有隨身行李什物仰專與即時對衆上簿收
寄令病人押字候痊可出廬日照數給還取領一病
民有疾勢危篤及病證奇異非見九散可以治療者
仰醫人審細立方別收買藥材修合其當月醫人不
能辦者提督官申來或喚上全行或請各醫同共診
視一病人在廬仰看守僧加意監督火頭煎藥煮粥
藥不許生冷一病人或有癰癤瘡瘍惡疾臭穢如不留意並加責罰
不許入東西兩廂合移入別房醫治一安樂廬在城
北門內高陽樓街坐落東南路自五龍真聖廟街入
西北路自筵橋一直取高陽樓街入一安樂廬屋共
用過錢六萬一千一百三十一貫一百九十五文米
三十一石七斗二升五合 增立新廬安樂廬所以
休養病于道路無所于歸者也始創于寶祐丙辰地
在北門高陽樓側督以官守以僧診視以職醫湯藥
取之公局錢米給之幫庫床榻器具無不畢備庖涸

沐浴各有其所事目已見前志第僻處一隅非惟官
府耳目不及而病者至廬亦以困殆開慶己未十二
月遂改建御路北酷庫後其屋視舊廬增三之二又
創置器物一千餘件暫守醫給之制皆如故若夫更
革之類末終成之歲月于記見之官廳三間僧行職
醫煎煮房六間佛堂神祠二間廬房七十二間門樓
一間廬司門子房二間廚房浴室六間前後過廊並
後門五間工物支費數目見于記其舊廬亦自兩存
蓋欲各隨其便也廬記景定元年春二月甲子建
康府新作安樂廬成太守資政殿大學士制置大使
馬公命元演記其事元演謝不能公色喻之曰廬之
基子所訪廬之役子所相將焉辭乃弗敢替命初寶
祐丁巳秋元演以富陽尉滿來長干謁公于玉麟公
寘之幕習聞閭閻府事求所以興民利修軍容者次第
觀焉尊所聞也安樂廬在北門高陽樓側創于丙辰
之冬見其規畫詳品式備守者備者與隣而居者手

額相告睹茲廬纔兩年行道疾病之人全活者不勝計由是作而嘆曰仁矣哉公之政歟公聞之曰未也城北去闕市遠甚廬以休病而趨者顧以遠病之我將改諸尋易鎮荆未果明年夏四月公再領昇印元演復從公遊一日謂元演曰子不記此廬改作之言乎以時考之可矣子儀圖之會得廢寨址于城闕廣袤二十丈距郡治百步而近公曰宜哉迺以十二月丙寅興役為屋凡百楹僧室醫房神棲佛宇煎飪之所洿洩之地衾簣器用視北廬加詳倘焉公又書安樂坊三大字表之邇遠至是竣事糜金錢百二十萬朱千斛有奇昇有郡以來廬之創自公始而周思曲慮弗便弗止可不謂仁乎蓋自周官遺人之職廢所謂設廬宿侯館以待羈旅以恤難阮者影響不存士一命以上媮與情錮其心腐其力有民人而餓死于我土地者往往而是尚能為四方疲癯殘疾者計邪惟我朝真文忠公始作安樂廬于壽沙志士仁人必

來取法公文忠門人也學其學而政其政固宜雖然
公將上佐天子相天下煦寒濯痍甦醒彫瘵使大宇
之內無一民一物不安且樂者此公全體大用之仁
也廬豈得以顯斯名哉夏五中澣門生文林郎特差
充江南東路安撫使司準
備差遣馬元演記並書

慈幼莊在皋橋隸江東轉運司真文忠公德秀創置馬

公先祖增添月給

嘉定十年二月省劄江東真運使申切見建康府自去年饑歉之後民食

日艱生子之家多是無力養育因以遺棄道路或致轉死溝壑殊可矜憫照得在國法諸災傷遺棄小兒官司給錢雇人乳養以賣戶絕田宅錢充而措置一事合隸常平今江東提舉司興建康隔遠奉行難于徧及申請待報必是稽遲恐失朝廷幼幼之意德秀今量度事宜將本司拘到諸州縣沒官田產措置召

人租佃立為一莊專以慈幼為名計其歲入委官掌管月支錢米雇人乳養凡有遺棄小兒即時責隣保勘會見得遺棄分明再行委官審實附籍給厯頭與收養之家每月支錢壹貫文米陸斗至五歲止其無人收養者所屬官司召募有乳婦人寄養月給一同至七歲止其欲以為己子或有人轉覓者聽從其便仍從官司給據其抱養之初襁褓未備則以錢兩貫文給之其病患者聽自陳給與藥費死亡者支錢二十貫文即時除籍或豐年遺棄稀少支用有餘則儲蓄以備荒歲賑給今已差委官吏措置租佃開立條約闢防偽冒頗為詳密深恐日後官吏或移為他用有失今來創立慈幼莊本意實為可惜今將本司見管沒官田產開具下項上元縣管下僧智彬田地計六百九十六畝三角二十六步伍用賢朱五四田坊二十六畝三十五步半溧陽縣管下僧德懃田地二百五十五畝一角二十七步郎學諭田地三百五十

畝二十步伏乞割下本司照會容勒碑紀載永永遵
守其于推廣朝廷幼幼之仁不為無補伏候指揮右
劉付江東轉運司從所中事理施行準此一在城
及上元江寧二縣管下應有遺棄小兒如有人欲收
養者即仰赴府官廳驗實給照例月支錢米其地
小兒發赴提督官廳驗實給照例月支錢米其地
里遠者許令每季一頓支請仍量給纏費一遺棄小
兒每人月支錢五百貫米三斗如願為已子者及轉
覓者皆聽其便于提督官廳置簿一扇就立小名以
千字文為號每名給照請至五歲止如無人收養者
仰所屬官司召募有乳婦人寄養支請錢米至七歲
止其支散日係提督官廳告報各人資本司照同抱
小兒赴廳審驗批照支散一若有遺棄小兒所屬官
司憚于往復申聞及隣保隱蔽不肯以實告者當坐
以罪一所養小兒如有病患仰經提督官廳自陳量
給藥費如不幸死亡支埋殯錢一貫文即時除籍一

所支錢米係于本司慈幼莊歷內每料闕錢五十貫
米三十石候月終提督官具收支之數赴本司呈
一提督官月支茶湯錢五貫文一慈幼莊手分月支
給扎錢二貫文一慈幼莊管莊人係蔣山保寧清涼
天禧四寺每歲輪差僧一人行者二人專一管幹莊
務收支並給散糧種每月共支米五石香油錢十貫
文一本莊屋宇及耕具遇有損壞聽申提督官廳備
申差人審實支錢修葺一置簿二扇凡本莊有什物
農具耕牛等並籍于簿以時稽考一置簿一扇在莊
每月收支錢米等赴本司呈押一置碯基簿一扇將
本司撥到本莊田產並間具坐落鄉村土名四至畝
步內一扇寄收本司錢物庫一扇本莊收管一本莊
合納夏秋二稅但于官物並不管屬縣分勒鄉攢細
具合納數目赴本司具呈發下一慈幼莊坐落係在
上元縣長樂鄉地名皋橋于嘉定七年拘沒到僧智
彬詭名置到莊地一十畝莊屋一所共計八間各計

五架又四厦內有倉三眼板全前後板門九扇板壁
二扇內有房三眼木窗五扇床二張厨屋一間一厦
接連屋三間二厦及門樓一溜板門全斗屋一所計
三間各計小五架又土瓦屋三間各計五架在下安
羅厝一副並羅厨一副客屋三項瓦屋三間二厦內
華屋半間各計五架並黑牯牛一頭見係丁亮居住
瓦屋二間半計五架並黃犍牛一頭並小牛兒一頭
黃牯牛一頭見係陳念乙居住瓦屋二間計五架並
黃犍牛一頭見係王千乙居住黃牯牛一頭黃牯牛
一頭黃牯犍牛一頭並看莊黃狗兒一隻見係黃王
二看養一本莊田地立為上中下三等收租田上等
每畝夏收小麥五斗四升軍斗秋納米七斗二升軍
斗地上等夏納小麥五斗四升軍斗秋納豆五斗四
升軍斗田中等每畝夏納小麥三斗七合軍斗秋納
米五斗四升軍斗地中等每畝夏納小麥二斗七升
軍斗秋納豆二斗七升軍斗田下等每畝夏納小麥

三斗三升四合軍斗秋納米三斗七升軍斗地下等
每畝夏納小麥二斗六升六合軍斗秋納豆二斗一
升六合軍斗已上各條租戶自出耕具種糧淨納租
數立為定額每年責令管莊僧行照夏秋兩耕拘催
送納如有頑戶拖欠仰申提督官廳立限催
促或遇災傷本莊具申本司委官覈實檢放

實濟院隸轉運司實祐六年二月創

省創大中大夫新
除戶部侍郎總領

淮西江東軍馬錢糧專一報發御前軍馬文字兼提
領措置屯田兼江南東路計度轉運副使余晦狀照
對本司恭準省劄給降黃榜備奉御筆俾監司守臣
軫念軍民創置養濟慈幼藥局等事晦誤將漕指務
廣聖恩遠在部內既因牒訴以達民情近在目前可
無惠利以蘇民瘼竊念建康為今陪都生齒繁阜前
參知政事臣真德秀將漕日曾置慈幼一局凡嬰孩
之遺棄於道有能收養者月給錢米至七歲乃止踰

四十年相仍不廢然鰥寡廢疾之無所養者未暇慮及正圖所以為賑贍之策明命一頒敢不祇奉德意遂於本府右北廂欽化橋一帶踏逐到總所舊北酒庫後閒地一段鼎新建造門廊房屋適六十餘間窓牖庖湍床榻余帳色色具備採取黃榜中語名曰實濟院收養無告之民以一百名為額每名月支米六斗鹽菜錢一十五貫文柴錢五貫文按旬給散且委通直郎本司主管文字洪穰專提其綱災給抱閭皆分兵吏職之一歲通計米七百五十石錢二萬五千貫文十七界竊照本司自端平年間置賑惠解庫一所以一十萬貫文十七界為本椿收利錢以備預糶濟民困楮價折閱本錢失陷獲息無幾自晦到任借撥官錢四十萬貫今量收解息數月之間得利倍之若滿一歲綽有餘用晦今將收到當得之錢撥填元借案名行下賑惠庫正作五十萬貫文附簿永充典本裁自晦離任日尚有利錢二萬九千餘貫儘可了令

年實濟院月支之費本司蕪湖縣寄納倉歲有耗剩
米裨助經常今于本任內將收到米令椿一千石留
供本院歲給自此每歲椿撥為例且于漕計初無虧
損見今伐石登載規式以示傳遠倘繼者更能推廣
上恩緝績善意使天民之窮免至夭札與德秀之慈
幼局經久並行其于九重懷保惠鮮之政不為無助
除已具錄奏聞外欲望朝廷更賜敷奏劄下本司照
應施行二月二十三日奉御寶批知外右劄付江東
轉運司從所申事理將上項庫本錢令項具入交承
帳內具收到息錢專充養濟院支散不許要行移用
具遵稟中尚書省準此院記聖天子新美百度純亦
不已迺寶祐五年冬十有一月壬戌四頒御筆風厲
臺郡修明舉幼贍窮藥疾建院設局之實政憂民恤
下堯舜之用心也丁丑制書馳傳下于江東爰飭漕
臣總覈一道九郡孚決羣聽職也建業為今陪都生
齒蕃夥先是參預文忠真公深惟治所思有以廣上

德意不使嬰孩棄而不舉為支泉粟以鞠撫之滿七
歲乃止人樂收養免于夭札于茲四十載四明余公
晦來將使指喟然曰幼而生生有攸賴矣鰥寡孤獨
天民之窮者而未有嘗食非缺歟將營圖之會奉明
詔迺度地欽化橋下明年春正月辛酉工徒並作而
屋廬之房室有列翼以門廡計六十間而贏撫黃勝
語號曰實濟院額以百人人予之米有常予之薪若
蔬準以泉有常典之以官若吏有常歲會之粟以斛
計七石有五十泉以楮計二萬有五千取粟于蕪湖
之庾餘而正其名取泉于賑惠之藏息而益其本可
以均而無浮可以久而無匱今而居斯宇廩斯養晝
處而夜息支贏而起疲咸得其所以近續天地生生
之大德所謂無告者不待告而知免矣矧司存劑藥
剗偽售真始至既一新之朝家遘布福星任之漕臺
于此可以觀矣或曰一人惠育元元必先其大者此
特其細竊謂不然揆諸周官以慈幼養老振窮恤孤

寬疾之政佐天子保安萬民大司徒職焉而可細視之歟上指仁厚儷美有周將順惟其人是可書已戊

午實祐六年春二月既望
朝奉郎廬山南馮去非記

制使姚公希得任內重修養濟院院創于嘉定其來已久事闕賙卹當加之意景定五年二月十三日興工重新整葺總費一萬一千二百餘緡米八十二石三斗有奇

及幼局咸淳元年正月馬公先祖鈞判叅政真公創慈幼局當使將漕時嘗增月給而本府前此乃欠舉行街

市間有遺棄小兒合立規模收養仍委官提督今具條

式如后

一本府城內外諸廂貧民遺棄小兒或願收養者具
四隣保明狀申提督官廳差人審實出給歷頭照
實祐五年大使已行創先夫抱養錢十八界四貫
朱五斗月支十八界三貫米三斗至七歲住支
一遺棄之時恐未便有人收養遂先雇乳
妳四名每名月支十八界六貫米五斗

一嬰孩寄養在乳妳家萬一無人收抱亦合區處今
自一歲後照抱養人例月支十八界兩貫米三斗
就令妳家權行撫育如有願就乳
妳之家接續抱養者聽月給照之

一每月一申民間抱養數並寄養乳妳家數申提督
官廳支請錢米仍仰各携抱當官點名以防偽冒

其有病患者仰不移時經提督廳給藥或有事故
即時具申銷籍所有本府錢米作四季成料撥付
所委官廳收管月中總數銷豁錢一料以
十八界五百貫米以百石酒三百瓶為準

一行下諸廂及兩縣尉司嚴督地方巡邏諸處如有
拋棄小兒仰即時申解提督廳每收一人與支犒
酒一瓶如由莽失收覺察到官廂官闕俸地
方等人等第究斷仍闕緝捕房專一覓察
一收到小兒恐無衣著本府隨時支撥絹布並支
無用衣服發下改造責令妳子付小兒裝著

景定建康志卷二十三

欽定四庫全書

景定建康志卷二十四

宋 周應合 撰

官守志一

書曰建邦設都樹后王君公承以大夫師長不惟逸豫
惟以亂民由古以來官制不同揚州有牧有刺史有大
都督丹陽有尹有太守昇州有刺史有知州事江寧有
尹有知府事建康有知府事有節度使既具于表前代
東府西州行臺列省既附於城闕志維今閩府所定臺

治所分參佐賓僚之居甲兵錢穀之所彙分序列宜有
考焉作官守志

府治

聖宋開寶八年十二月二十七日江南平以李煜故府
為昇州治天禧二年二月戊辰詔改為江寧府置建康
軍節度建炎三年五月丙辰詔改為建康府節鎮舊號
如故紹興三年以府治建為行宮以轉運衙改為府治
在行宮之東南隅秦淮水之北

詳見府
廨圖

凡留守知府事

制置使安撫使宣撫使兵馬都督皆治于此

設廳居中左右修廊

戒石亭在設廳之前

儀門在戒石亭之南

府門在儀門之南

鼓角樓在府門之旁

清心堂在設廳之後

忠實不欺之堂在清心堂之後堂名乃宸翰所賜前有

齋左曰雲瑞右曰日思

右史陸公壑記云堂制使尚書馬公妥皇帝御扁作也初乙卯冬壑解節濡須道金陵入謁公肅于玉麟揭忠實不欺之堂六大字壑拜而請曰伊上之賜昭公之心將易而名諸公曰否余起䟽遯際熙明猗無他技蚤暮檢省惟忠惟實惟不欺慊未能也頃俟罪神臯登侍清燕自天有賁是訓是彝實朝夕企瞻罔敢替明日譙正堂六大字復臨乎上公之意可識矣

稍環顧厥屋傳聽事後面偪腋侵褻不能十丈老而將壓壓輒啟公曷若斥大其制以奉壁奎之躔使邦之人近光而自勸沿名而胥效哉公未許也越三載夏孟辛卯倅圖及書來諭政豐理裕百廢具飭堂撤而新矣扁揭而奠矣以子知顛末尚爲我記之壓竦而作曰非忠實不欺然邪昔之君子聽政修令辨儀定志亦旣䟽戶廷截阼祀至其酬酢餘隙以涵以滋又必有從容偃息之舍延壽之閣韋郎之宴寢是也

矧陪都地鉅物夥表拓裏鎮有臨護之大有湊犇之
衆胸湫則煩神壅則涸所以廢續其無倦權度其汎
應不在斯乎而百二十年來非乏名卿相寒廳宿圃
更腹迭墜獨斯未暇者堂所安也纖緻于所安嫌也
嗚呼盡心之謂忠心所不便不容矯循事之謂實事
所當草不容緩公寧躬改作之厯而必遺後人以安
身崇德之抵寧舍撓避之謙而必畀斯人以存我厚
生之福非其中有不能頃刻居者必不忍自欺邪不

自欺則不欺君矣退食之暇補旦晝而棲太虛質天
日而葆方寸愈委蛇愈儼恪愈渟深愈通溥堂也者
其德之奧歟雖然公人中龍也可以雷域中可以雨
天下北門鎖鑰非準不付一衣帶水果限南北邪或
曰一堂之營無述焉可也其不敢不述者公所命也
堂爲間七後是者五馬各翼以步廡臨以軫軒中爲
航齋公成畫也添差通判汪洵之治其凡添差總管
鄭良臣課其悉叶昞廼司五趾竣事公遴委也公名

光祖字華父金華人師事母自欺齋西山真公有本
固如是今以寶章閣學士制置沿江兼留守行宮云
寶祐五年閏月既望朝奉大夫行尚書禮部員外郎
兼國史院編修官實錄院檢討官時暫兼權侍立修
注官兼崇政殿說書陸堅謹記朝奉大夫集英殿修
撰知太平州軍州事兼管內勸農營田使節制本州
屯戍軍馬胡大昌書并篆蓋
靜得堂在忠實不欺之堂後

王麟堂在忠實不欺之堂之左後瞰青溪前臨芙蓉池
喜雨軒在前恕齋在後有竹軒在旁靜齋在右學齋在左
杜公杲記學齋云人不可以不知學也五常之性未
嘗不均涵養日加然後光大人不知學愚者日以昏
不肖者日以悖天之予我者亡矣是猶責履于跛責
視于眇不足以有行不足以有見也百工技藝罔不
由學士大夫求善于吾身有用于世反不知學而
甘心于昏且悖豈不謬哉余以非才薦更任使踰七

望八分間金陵軍民事夥坐廢讀書閒得少休凝神
默坐溫故知新不敢以老而怠府治便坐率高堂敞
楹以侈燕飲以合優樂非藏修肄習之處東偏有室
三楹介于內外頗為安便止留北窓餘悉室塞殊失
艮背之義甃久地潤非昏曉重着之所宜于是辟南
以得明棧地以離濕其南正面堵牆一物無所見寸
步不可行予曰人而不為周南召南其猶正牆面而
立周官曰不學牆面遂名曰學齋讀書于此延客于

此間亦治事于此仰而思之夜以繼日求其所當學者庶幾于理明達視有所見行無所碍則是牆也爲吾之銘盤爲吾之丹書不然閉而不覩其何以行之哉

錦繡堂在玉麟堂之左上爲忠勤樓堂名樓名皆宸翰所賜庭中左右植金華二石屋之其前爲木屏臺又其前爲碑亭有堂在左曰水鄉

退庵吳公淵記臣至愚極陋老又及之陛下未忍棄

捐使待罪江間臣雖職思其憂不敢食馬怠事然課
功會績自視闕然廼五月丙寅御筆煥頒以臣粗著
忠勤除臣資政殿學士職任如故臣得寵驚惶拜恩
感泣大懼無以對揚聖天子顯休命會郡樓新成乃
拜手稽首有請乞宸翰揭其上庶幾舉頭仰瞻鞠躬
佩服威顏咫尺罔敢有越厥志天穹聽卑朝奏夕賚
蚪騰龍翔之勢銀鈎鉄畫之體自光堯以來擅書聖
者弗能及石頭鍾阜秦淮青溪水涯山巔若草木若

泉石莫不衣被天光膏沐聖澤榮耀無比而況於邦
之人況於邦之守乎臣旣已肅冠裳訊龜筮昭扁榜
勒金石用詔無極又拜手稽首言曰昔我高皇嘗以
風雲慶會賜臣沂中逮我孝廟亦以明良亨會賜臣
浩然皆私第非公宇太宗雖爲臣易簡書玉堂之廬
然在禁密之地非外藩服今臣蒙恩賚實出創見天
下郡國益鮮有此豈非希濶之遇千載之一逢與夫
霍去病之志滅匈奴祖逖之誓清中原此疆場之臣

卷之二十四
之所謂忠諸葛亮之經事綜物陶侃之運甓惜陰此
疆場之臣之所謂勤臣不敢不策朽磨鈍圖報陛下
萬分一臣淵惶懼懼頓首頓首淳祐十年十二月
下浣資政殿學士大中大夫沿江制置使充江南東
路安撫使馬步軍都總管兼營田使兼知建康軍府
事兼管內勸農使兼行宮留守節制和州無爲軍安
慶府兼三郡屯田使金陵郡侯食邑一千三百戶食
實封一百戶臣吳淵拜手稽首謹言

闕
在忠實不欺之堂之右

安撫司僉廳在西廳之西

詳見安撫司

制置司僉廳在儀門之東

詳見制置司

府都僉廳在儀門之西

鎮青堂在府廨之東北其上爲鍾山樓其後爲青溪道

院木犀亭曰小山荊亭曰晚香牡丹亭曰錦堆芍藥亭

曰駐春皆在堂之左疊石成山上爲亭曰一丘一壑下

爲金魚池亭曰真愛其南爲曲水池亭曰觴詠又其西

爲杏花村桃李蹊亭曰種春竹亭曰深淨梅亭曰雪香
海棠亭曰嫁梅皆在堂之右青溪一曲環其前左有橋
通水鄉名小垂虹右有橋通錦繡堂榜曰藕花多處皆
郡圃也其堂之輿榜曰紬書景定修志其中故名堂之
東便門通青溪道中

西花園在安撫司僉廳右馬公光祖改爲惠民藥局
看窓二所其一在西花園之東南臨御街榜曰近民馬公
光祖改爲軍裝局其一在嫁梅亭後臨東虹桥

通判廳

國朝會要置諸州通判各一員西京南京天雄成德等州各二員江寧府初置一員嘉祐中審官院言西京北京荆南江寧府等並是京府及安撫使都鈐轄分領州鎮其通判今後並以知州資序人差充其後視西京等例增置一員分東西二廳其後又添差一員以朝士充是為南廳今東廳在府子城內之左西廳在子城內之右南廳在子城外之西南各有題名

東廳壁記官有丞輔尚矣于事大從其長小則專達所以別長貳正名體也秦初置郡則有丞漢以來治中別駕隋唐司馬長史郡贊治名官殊所以佐守一也粵我藝祖懲藩鎮弊置通判以分州權事無所不預至得按察所部意若使之權任與均器能相用設施同慮休戚一體非復餘長貳比事久而殊意寢非初因均齊之力立嫌偏之勢佐其長而不能使其跡不疑于長于是有不敢任事者則以丞負余為解惟金陵不然居守率重

臣鉅人無偏與嫌疑競不生上佐帥郡從事日至簽事
廳鉅細歸程督視他州第以香礬茶鹽經總制為事所
于兵民賦役聽斷占位書惟謹而不預知其故者絕不
同初蓋獨員繼迺增置故東西對峙為倅兩廳其曰東
廳者初置員也建炎紹興初師興應百須此官號繁劇
後雖屯重戍而王人振糧道東倅職兼審計軍稍而已
無他調度事嘗少省矣自北鄙繹騷兵既休而歲游饑
淮民流至府下以萬計課廩給條賑揀策弭盜是不一

端開封鄭公鎮以祕閣來適丁斯時雞初鳴明燭坐公所筆不及停慮不敢暇佐治之勞幾與關決大邑比而公以四姓之英天分高薰蒸不凡動有典刑處之常裕如暇日閱廳壁舊記慮鉅梓易漫刻著于石不以志行位下且不在能言之流俾書其端夫人惟力閒暇而後心和平心和平而後設施有緒公于倥偬不暇之際而能去苟且為悠久非材有餘能爾耶昔志行大父南渡初倅是邦凡四寒暑供軍嘗殫勞舊記顧軼其名豈歲

月在追紀以前故耶茲不敢求附于書獨叙陪都貳
車體異于他郡而事夥于今日者如此且見公能以
易處之使來者有攷焉嘉定二禩長至從政郎總領
淮西江東軍馬錢糧所準備差遣蔣志行記

秦規

右朝散郎紹興八年二月
到任十年三月內任滿

鄧邦寧

左朝散郎紹興十年三月
到任十二年閏月任滿

蔡祐

右宣教郎紹興十二年四月五日
到任十四年四月初五日任滿

張敏功

右朝奉大夫紹興十四年四月初六
日到任十六年四月初六日任滿

張頡

左朝奉大夫紹興十六年四月初十日到任十八年四月初十日任滿

葛與時

右朝散郎紹興十八年四月十二日到任十九年五月內召

黃允

右朝奉大夫紹興十九年七月到任二十一年八月二十五日任滿

徐璞

右奉議郎紹興二十一年八月二十四日任滿

王賓

左奉議郎紹興二十三年十月十五日到任

楊雲

左承議郎紹興二十五年五月十四日到任二十七年六月初七日任滿

周淙

右奉議郎紹興二十七年六月六日到任二十九年八月二十三日任滿

蘇師德

右朝奉大夫紹興二十九年八月二十二日到任三十一年改除

平茶

鹽公
事

葛祺

右通真郎紹興三十一年七月二十三日到任隆興二年正月一日任滿

呂正己

右朝奉郎隆興二年正月一日到任當年六月二十五日改差知無為軍

張維

左朝奉郎元係添差隆興二年六月二十五日填呂正己闕乾道元年三月十五滿

李大亨

右朝奉郎乾道元年三月十五日到任三年四月十三日任滿

嚴煥

左承議郎乾道三年六月十八日到任五年六月二十五日任滿

任元愷

右承議郎乾道五年七月初十日到任六年四月初十日改差主管合州崇道觀

秦淵

左朝散郎乾道六年四月三十日到任八年四月三十日任滿

季壁

右朝請郎乾道八年六月十二日到任淳熙二年二月初三日任滿

錢徽之

朝請大夫淳熙二年二月初三日到任淳熙四年三月初八日任滿

王復

朝散郎淳熙四年三月初八日到任淳熙五年八月初八日致仕

陸靜之

朝散大夫淳熙五年十二月初一日到任淳熙八年閏三月初一日任滿

范棟

承議郎淳熙八年閏三月初一日到任十年四月初五日任滿

洪邃

承議郎淳熙十年四月初六日到任十一年十月轉朝奉郎十二年八月初六日任滿

詹承宗

朝奉郎淳熙十二年八月初十日轉朝散郎任淳熙十四年八月初十日任滿

李誼

承議郎淳熙十四年十二月十五日到任

高特

朝散郎淳熙十六年十月十四日到任紹熙二年十月間日任滿

畢蒂文

朝散郎紹熙二年十一月二十一日到任三年二月十一日轉朝請郎紹熙四年十

二月二十七日滿

范成績

朝奉大夫紹熙四年十二月二十八日到任

朱贊

奉直大夫慶元元年八月二十七日到任

連逢辰

朝奉大夫慶元二年十二月二十二日到任慶元五年正月二十二日任滿知英德府

鄭師尹

朝奉郎慶元五年正月二十三日到任嘉泰元年正月三十日任滿

鄒補之

朝奉郎嘉泰五年二月初一日到任當年九月二十五日致仕

傅公邵

朝奉郎嘉泰二年二月十四日到任嘉泰四年三月初三日任滿

高得全

朝散郎嘉泰四年三月初三日到任五月轉朝請郎開禧二年四月任滿知黃州

趙善瓌

朝請大夫開禧二年四月二十日到任次年正月十六日致仕

尤棐

朝奉郎開禧三年五月十八日到任嘉定二年五月十八日任滿知衡州

鄭鎮

承議郎直秘閣嘉定二年五月二十一日到任至四年五月二十一日任滿

施誠一

嘉定四年六月十七日到任嘉定五年十二月二十一日終

張宗泌

朝散郎嘉定六年四月十一日到任至嘉定八年十二月二十七日任滿

吳綱

承議郎直寶謨閣嘉定八年十二月到任嘉定九年五月初九日改除太社令

潘標

奉議郎嘉定九年十二月到任至嘉定十一年八月特改差通判臨安府

林叔誠

奉議郎嘉定十一年十月十四日到任十三年十二月二十八日任滿

沈杲

宣教郎嘉定十三年十二月二十八日到任十四年四月十四日致仕

尤爚

通直郎嘉定十四年十一月十四日到任至嘉定十六年十二月初六日任滿

王淪

朝散大夫嘉定十六年十二月初七日到任至寶慶二年二月初九日任滿

趙崇慤

朝請郎寶慶二年二月初十日到任至紹定元年四月十三日任滿

錢顯祖

朝奉大夫紹定元年四月十四日到任至當年十二月二十四日致仕

吳焯

朝奉大夫紹定二年四月到任三年二月特差兼沿江制機四年四月就任差知高郵軍

樓樾

朝請郎紹定四年七月到任五年閏九月初十日任滿

衛湜

朝奉郎于紹定六年九月初十日到端平元年五月二十四日改差知全州

趙希珣

朝散郎端平元年十月到任二年七月轉朝請郎八月差監行在左藏東庫

呂好問

奉議郎端平二年十月到任三年二月因賞轉承議郎四月轉朝奉郎嘉熙元年十

月除籍田令兼沿江制置使司參議官嘉熙元年十一月初六日替

周窠

朝散郎嘉熙元年十二月初六日到任嘉熙二年閏四月二十二日致仕

薛坦

朝散郎行太社令嘉熙二年五月到十月除軍器監簿仍舊通判三年八月轉朝請郎三

年六月除軍器監丞兼都督軍馬行府主管機宜文字

趙希畬

朝散郎嘉熙四年正月到任淳祐元年八月二十一日罷任

費伯英

宣教郎淳祐元年十一月到任二年六月內坐奉職吏論祠

婁體仁

奉議郎淳祐二年八月到任三年三月轉承議郎四年

秦九韶

通直郎淳祐四年八月到任十一月丁母憂解任

趙希淦

朝奉郎淳祐五年三月到任因賞轉朝散郎七年四月滿

陳夢龍

淳祐七年四月到任九年四月得官交替

江華

淳祐九年四月到任十年六月差充江東帥參

沈璧

淳祐十年十一月到任十一年十月轉朝散郎十二年二月闕日隨司解任

范慶家

朝奉郎淳祐十二年三月到任十一月闕日差知循州

韓燮

通直郎淳祐十二年十二月到任實祐改元三月兼分差審計司二年九月轉奉議郎十

二月任滿辟充

江東添差帥參

陳訥

朝請郎寶祐三年三月到任五年二月轉朝奉大夫四月十五日滿

楊瑤

朝散郎寶祐五年四月到任開慶元年四月制劄差權安慶府六月初三日滿

李逢魁

朝散郎開慶元年六月初三日到任

張士遜

西廳壁記廳壁有記古也建康為今留都地重事夥

倅貳治所在戟門之外西東對峙余承之于茲首問
舊政而西獨未之聞維昔建一官而分是職前英後
傑固不乏人紹興戊午李公宏被薦入臺代之者宗
子趙公略見于東廳之記自時厥後無從稽考豈舊
有碑而偶不存耶抑因循而未克建立也于是詢訪
耆老得前政姓名自戊辰沈公大有而下凡二十有
九人其到滿歲月屢加搜求無能知者因念史之闕
文自古而有春秋夏五郭公之書是矣敢以史筆之

法書其可知者見于左方庶幾後來者有所攷云慶
元戊午孟夏望日江陰何武仲記

沈大有

承議郎紹興
十九年在任

史侯

朝奉
郎

梁審禮

開
大夫

史琮

中開
大夫

李衡老

朝奉
郎

邢孝肅

承議郎
直秘閣

張郟

宣教郎

劉子昂

朝請大夫

方濤

承議郎

路申中

承議郎

梁季珩

宣教郎

何幾先

奉議郎

周樞

朝請大夫

潘恕

朝散郎
乾道六年任

鄭復

朝請大夫

馮田

承議郎

程行敏

朝奉郎

張埏

承議郎

姜凱

承議郎

陳驥

朝奉郎

高曇

宣教郎淳熙八年十月到任

薛琛

朝奉郎淳熙十年十月二十二日到任

汪檐

朝奉郎淳熙十一年八月二十六日到任

蔡理

朝請大夫淳熙十三年十月初三日到任

朱致民

承議郎淳熙十五年十一月初三日到任

廖俟

朝請郎紹熙元年十一月十五日到任

林光祖

朝奉郎紹熙三年十二月二十四日到任

王萬樞

朝散大夫紹熙四年七月二十八日到任

林致

承議郎慶元元年八月初七日到任

何武仲

朝奉大夫慶元二年十二月二十二日到任

陸相

朝奉郎慶元四年十一月二十七日到任

汪檝

朝請郎嘉泰元年三月初四日到任

何洪

承議郎嘉泰三年三月二十一日到任

翟昀

承議郎嘉泰三年六月二十八日到任開禧元年七月十七日任滿得替

李稠

朝奉大夫開禧元年七月到任三年八月因賞轉朝散大夫三年九月初一日任滿

張維

承議郎開禧三年九月到任嘉定二年十月闕滿替

莫祕

朝請大夫嘉定二年十月初八日到任嘉定四年十一月初六日滿

陳章

承議郎嘉定四年十一月初六日到六年閏九月勅差提轄行在權貨務都茶場建康府

司置

李渙

朝奉郎嘉定六年十二月到任八年十二月轉朝散郎二十一日滿

曾耆年

嘉定八年十二月到任九年六月轉朝散郎十年十二月任滿

孫仁榮

嘉定十年十二月到任十二年十二月任滿

趙汝璽

嘉定十二年十二月到任

彭耕

嘉定十四年三月二十八日到任

趙汝親

嘉定十六年三月二十四日到任

汪繹

寶慶元年四月到任九月轉朝請郎三年四月任滿績差知興國軍

沈柔孫

寶慶三年四月二十七日到任
紹定二年四月三十日任滿

汪闡中

紹定二年四月三十日到任

汪文舉

奉直大夫紹定四年六月到任十二月
差權和州紹定五年九月初七日到任

衛价

朝散郎紹定六年六月十一日到任
任端平二年二月初二日滿任

唐璘

朝奉郎端平二年二月到任至
三年十月初一日除監察御史

樓扶

宣教郎端平三年十一月到任十二月
直郎兼沿江制機嘉熙元年九月
弓祠離任

林宜孫

承議郎嘉熙二年四月十七日到任
到任十月十二日丁父憂去

豐雲昭

通直郎嘉熙二年十二月到任嘉
熙三年三月改添差通判臨安府

朱燦

承議郎嘉熙三年四月初七日到任
至淳祐元年閏月閏日滿替

盛文昭

通直郎淳祐元年六月初三日離任

史彌厚

朝請郎淳祐元年十一月初十日滿
到任二年七月初十日滿

陳允堅

奉議郎淳祐三年十一月與祠

趙時鑑

奉議郎淳祐五年三月到任四月
月差監鎮江府分司糧料院

高衡孫

承議郎淳祐七年四月到任八年
七月差幹辦行在諸司審計司

虞珪

通直郎淳祐八年八月到任十月轉奉
議郎九年四月權直州分司檢閱官

王同祖

奉議郎淳祐九年十一月初到任次
年改添差沿江制司機宜文字

葉隆禮

承奉郎淳祐十年十月到任至十一年二月改除國子監簿離任

宋宗

宣教郎淳祐十二年八月到任至寶祐二年十月滿

何處任

承議郎寶祐二年三月到任五年閏四月初八日滿替

辛應中

朝散郎寶祐五年閏四月到任
關七字 避親離任

葉溥

承議郎寶祐六年二月到任開慶元年四月轉朝奉郎

王起晦

通直郎景定元年正月十一日到任二年正月改差沿江制置大使司參議官行在

諸司審計司

薛季弼

朝奉郎景定二年五月二十八日到任

南廳壁記國家駐蹕錢塘而金陵為留都地望雄重東南會府莫先焉以旄鉞出鎮者率宰執大臣故別駕之選特重蓋古河南少尹職也他郡別駕一人或二人此獨視行在所又有員外置為三例以處廷紳補外者職清事簡府公不盡吏之號方外司馬人以為榮顧其創置歲月且深前人氏名漫不可攷非闕歟寶祐戊午梁侯椅由太史氏為之銳欲攷訂礮石以俟會召還不果代者廖侯邦傑方据撫故實俄遷他官去迨潘侯夢奇

來乃踵成之求諸故府自嘉熙戊戌後得其氏名者僅
十有四人悉疏歲月下方刻之堅珉闕典始備潘侯諡
余俾識顛末余復之曰題名不可闕也抑名之不朽豈
顯在是江州司馬之職非廳壁一記則不傳然其傳也
以樂天不以記否則唐之為司馬者何獨樂天千載而
下磨滅誰紀士大夫自為不朽計可也潘侯曰善因並
識之以告來者侯京口人大資政馬公光祖鎮金陵以
其嘗為尚書省檢閱文字選辟云景定改元歲在庚申

孟秋朔日士林郎宜差充沿江制置大使司幹辦公事
吳季子記迪功郎建康府司戶叅軍兼僉廳袁充書
朝散郎沿江制置大使司叅議官孫吳會篆蓋奉議
郎宜特改差通判建康軍府兼管內勸農營田事仍
偕緋兼沿江制置大使司主管機宜文字潘夢竒立

戴宗昭

奉議郎嘉熙三年十月十九日到任

陳有成

奉議郎淳祐元年正月二十四日到任

黃約天

朝奉郎淳祐二年九月初一日到任淳祐四年九月初一日再任

費伯隆

通直郎淳祐八年三月十八日到任

高斯復

奉議郎淳祐十年八月二十日到任至淳祐十二年二月改差池州通判

章輝

朝請郎淳祐十二年八月二十日到任

潘驥

朝散郎寶祐二年九月二十七日到任至四年閏月閏日改辟添差江東帥參

何宗姚

承議郎寶祐四年八月初六日到任十二月準省劄與沿江制機汪洵之兩易其任

汪洵之

通直郎寶祐五年八月二十一日到任至當年十月內除官告院

汪立信

宣教郎寶祐五年十月十九日到任

梁椅

宣教郎寶祐八年六月到任開慶元年三月除宗正寺簿

廖邦傑

承議郎開慶元年二月改差仍兼淮西餉管三月除告院仍舊十二月改辟江東帥

參

潘夢奇

奉議郎景定元年正月二十七日到任十月轉承議郎二年五月轉朝奉郎

職官廳

職官三員一曰簽書建康軍節度判官廳公事廨舍在府門內之左通判東廳之南二曰節度推官廨舍在府門內之右通判西廳之南三曰觀察推官廨舍在府門內之左簽判廨舍之南各有題名

簽判題名簽幕號郡寮之長陪京大府又非他郡比
其選任亦不輕矣若昔譽髦秀雋接踵而居是職不
知凡幾顧瞻四壁莫有紀其名氏使後來者漫然亡
所考究茲非甚闕典歟余以嘉定甲申之秋充員于
茲旁搜故牘推迹累政思欲輯為廳記力猶未給一
日上元趙令尹時僑語余曰吾縣有題名之碣鐫勒
遍矣將伐石以續丐君為之文堂並采其石以為君
贈可乎余曰諾厥既得茲石于是命工以刻之然縣

襍之邈者不可得而詳近自三十年來有替上始末
之可考者僅得大魁傅公而下凡十人遂列于石雖
不能盡述乎既往抑將有關於方來云寶慶初元歲
在乙酉立秋日朝奉郎簽書建康軍節度判官廳公
事賜緋魚袋劔津鄧文舉仲文謹識

傅行簡

承事郎嘉泰三年十二月內到任至
開禧三年五月二十一日召赴行在

樓枏

通直郎開禧元年七月十一日到任
至開禧三年九月二十三日滿替

蔡震

承議郎開禧三年九月二十四日到
任至嘉定三年二月十一日滿替

朱元龜

承議郎嘉定三年二月十二日到任至本年五月初七致仕

趙與愆

承務郎嘉定四年閏二月十七日到任至五年十月內丁父憂

王師閔

承事郎嘉定七年二月初十日到任至九年正月初四致仕

袁甫

承事郎嘉定九年三月十三日到任至十年五月二十六日召赴行在

何叔智

承議郎嘉定十年十二月二十六日到任至十三年二月二十一日滿替

葉時

朝散郎嘉定十三年二月初三日到任至十五年六月初三日滿替

石孝睦

承議郎嘉定十五年六月初四日到任至十七年七月二十五日滿替

鄧文舉

承議郎嘉定十七年七月二十六日到任

王修

通直郎寶慶二年八月十二日到任至紹定元年九月初五日滿替當月初七日準省劄

差充六部提領酒庫祈主管文字

余元虞

承議郎紹定元年九月初五日到任

毛汝大

奉議郎紹定三年十月十二日到任至紹定五年十二月二十一日滿替

吳當可

朝請郎紹定五年十二月二十二日到任六年九月二十七日準省劄差充沿江制

置使司主管機宜文字

潘晉孫

葉之瑞

通直郎端平元年十二月初二日到任至嘉熙元年閏月閏日滿替

李尚

朝奉郎嘉熙元年四月二十六日到任次年九月二十五日致仕

賀賅

嘉熙二年十二月十四日到任淳祐元年四月初六日離任赴班

沈時中

淳祐元年四月初七日到任至淳祐三年四月二十八日滿替

趙汝玫

朝散郎淳祐三年四月二十八日到任

陸祀

承議郎淳祐五年八月二十二日到任

黎九德

宣教郎淳祐八年四月初五日到任

施沂

承宣郎淳祐九年四月十五日到任

曹之格

承事郎淳祐十年九月初六日到任至十二年十月十三日改知上元縣事

趙與濂

奉議郎淳祐十二年十月初八日到任至寶祐二年十月二十六日準省劄差通判

建康軍府事
賜緋魚袋

高純嘏

承務郎寶祐二年十二月初八日到任至寶祐四年七月十二日致仕

于庭蘭

承事郎寶祐四年十一月十三日到任

王文子

宣議郎開慶元年二月二十一日到任

劉曾

奉議郎景定元年十二月二十六日到任

節推題名官無崇卑職有更代所以識名氏紀歲月使後之視今猶今之視昔示不忘也金陵帝王州節鎮係

焉南渡以來佩麟符而宅司牧者非宰輔則法從勢隆
位尊非他守比地廣民夥非他郡比昌黎所謂元戎總
齊三軍之事統理所部之貳蓋節度推官實得以贊裨
焉信乎非閎辨通敏無人之材莫宜居淳熙間趙公彥
櫛嘗繇是官階通顯自時厥後類不乏賢而紀載之文
獨闕不著沆以庸虛承乏于此藐焉暇日因訪耆吏得
趙公而下凡十有一人會前官程君德臣復來司酒政
以乙酉班通籍而行盛事也故樂與之綜輯次第而鏡

諸石若夫辭宇之將圯工役之未至則實以無他事
力故不得以究一日必葺之意後之來者能以沆前
之所叙者為功名勉以沆後之所歎者為交締好則
是記也不特為識名氏紀歲月而已也嘉定甲申中
秋日儒林郎建康軍節度推官程沆記

趙彥櫛

宋覽

趙善章

趙善象

趙善璉

李尉

蔣肅

開禧元年七月二日到任

趙希闔

嘉定元年八月十六日到任

錢革

嘉定四年十月五日到任

程德臣

嘉定八年十一月二十日到任

王遵度

嘉定十二年正月十八日到任

程沆

嘉定十六年二月二十四日到任

虞允榮

寶慶二年三月十一日到任

趙深夫

紹定元年三月十七日到任

強琪

紹定四年四月十四日到任

趙汝靜

紹定六年四月十四日到任

羅叔韶

端平二年六月二十九日到任

趙希臣

端平三年三月二十三日任

趙希埒

嘉熙三年七月初五日到任

湯通

淳祐二年四月初三日到任

袁徽

淳祐六年七月十九日到任

趙汝末

淳祐八年八月十二日到任

楊繼祖

淳祐十年十月初八日到任

趙汝訓

寶祐元年十月十九日到任

魏琰

寶祐四年十一月初十日到任

陳開先

寶祐六年十二月初一日到任
景定元年十二月初一日赴班

葉起翁

承直郎景定二年四月闕到任

察推題名建康古為王者之宅六朝南唐遺蹟具存高
宗南巡駐蹕錢塘以是為陪都嘗因視師臨幸麟符留
鑰謀帥重于他鎮非當代名位俱隆者不在茲選察家
亦不以輕授故每號為得士焉余鄉人劉宗直叔向由
慶元五年乙科為觀察推官善于其職貽書求為壁記
余聞是邦衣冠走集之地商賈輻輳軍民雜揉宜乎官
府日不暇給而幕訟最稀庭無留事幕府省文書幾若
道院然雖流風餘俗其來有自非賓主多賢積而致此

耶自紹興七年趙君不蘭而下得二十餘人閱其名氏如丞相蔣公以文章著侍御蕭公以風節顯貳卿丘公入則為朝廷羽儀出則為郡國標表進用固未艾也去此而登臚仕者又不一此官之不輕如此宗直勉旃其益攄婉畫以佐而長以昌賢業以繼諸名公之軌躅豈惟所居之官大抑鄉黨與有榮焉嘉泰三年冬至日顯謨閣直學士通議大夫提舉江州太平興國宮奉化縣開國子食邑五百戶四明樓鑰記

趙不蘭

紹興七年到任
十一年任滿

馬昇之

紹興十一年到
任十四年任滿

張滋

紹興十四年到
任十七年改官

陳與善

紹興十七年到任
十九年十月致仕

趙公衡

紹興十九年到任
二十三年任滿

張舜由

紹興二十三年到
任二十五年任滿

蔣芾

紹興二十五年二月到
任二十七年六月丁憂

蕭之敏

紹興二十七年九
月到任三十年滿

曾宗鎮

紹興三十年五月到
任隆興元年任滿

趙伯衍

隆興元年三月到任
乾道二年四月任滿

丘宓

乾道二年四月到
任五年四月任滿

褚意

乾道五年四月到
任八年任滿

王以寧

乾道八年十一月到
任淳熙三年滿任

郭繼道

淳熙三年三月到
任六年任滿

劉慤士

淳熙六年四月到
任九年任滿

白仲舉

淳熙九年五月到
任十二年任滿

趙善紀

淳熙十二年六月到任
紹熙元年任滿

趙崇禮

紹熙元年閏五月到任
二年致仕

李埴

紹熙二年九月到任
紹熙四年致仕

趙善惠

紹熙四年十二月到任
慶元元年九月丁憂去

趙彥泉

慶元二年三月到任
慶元五年七月任滿

陳公慶

慶元五年七月到任
嘉泰元年十一月丁憂去

劉叔向

嘉泰二年三月到任
開禧元年四月三日任滿

趙黥夫

開禧元年四月三日到任

俞道一

嘉定元年四月初六日到任

袁肅

嘉定二年五月初二十八日到任
嘉定五年七月初三日任滿

馬士仲

嘉定五年七月初三日到任
嘉定六年五月閏日任滿

趙師淨

嘉定八年九月到任

趙彥楠

嘉定十年四月二十三日到任
嘉定十三年五月四日任滿

鮑克正

嘉定十三年五月四日到任

趙汝然

嘉定十六年三月十一日到任

呂樗年

寶慶二年九月十一日到任

江魁祖

實慶三年十二月十九日到任
紹定四年五月二十二日到任滿

趙汝儻

紹定四年五月二十二日到任
端平元年七月閏十二日到任滿

張榘

端平元年七月二十八日到任
嘉熙元年七月二十八日到任滿

趙善比

嘉熙元年八月十七日到任

張應星

迪功郎嘉熙四年四月二十四日到任

林溥

從事郎淳祐三年十二月二十一日到任
淳祐五年正月十三日陳乞避親離任

王肖翁

承直郎淳祐五年六月初六日到任

葉春

從政郎淳祐五年十二月初五日到任
至淳祐八年二月初五日到任滿

趙與進

從事郎淳祐八年二月初六日到任
至淳祐十一年五月初二日任滿

制使姚公希得任內創置府幕官廨宇一所本府職官
闕廨舍景定四年五月二十五日買內西夾道民廬一
區為屋一十四間永充官宇厥直一萬三千五百貫今
添差節推居焉

景定建康志卷二十四